



## Malaysia Green Forum Beri Impak Baru Isu Kualiti Lanskap



*Tun Jeanne Abdullah (tengah) bersama Prof. Datin Paduka Dr. Aini Ideris, Timbalan Naib Canselor (Akademik dan Antarabangsa) menyaksikan gimik Malaysia Green Forum.*

**SERDANG, 5 April** - Malaysia Green Forum 2010 (MGF 2010) akan memberi impak baru kualiti lanskap dan alam sekitar negara kepada generasi akan datang, kata Pengerusi Lanskap Malaysia, Tun Jeanne Abdullah.

“Forum ini diharap menjadi platform cendekiawan alam sekitar dari dalam dan luar negara mencari pendekatan terbaik untuk diusulkan kepada pihak kerajaan bagi melestarikan alam sekitar secara efektif.

“Diharapkan forum ini akan menghasilkan resolusi bagi menangani kemerosotan alam sekitar dan persekitaran hidup manusia dengan lebih berkesan,” katanya pada sidang media pelancaran MGF 2010 di sini anjuran Universiti Putra Malaysia (UPM), Lanskap Malaysia dan Perbadanan Putrajaya.

Forum bertemakan ‘Greener and Sustainable Malaysia’ pada 26-27 April 2010 akan dirasmikan oleh Perdana Menteri Malaysia, Dato’ Seri Najib Tun Razak dengan dihadiri seramai 450 peserta forum terdiri daripada pegawai tinggi kerajaan, ahli akademik, ahli badan bukan kerajaan dan swasta.

Tun Jeanne berkata ia sejajar dengan hasrat Perdana Menteri untuk menjadikan negara lebih mesra alam bagi mengurangkan 40% karbon dioksida menjelang tahun 2020.

Dekan Fakulti Rekabentuk dan Senibina Prof. Madya Dr. Osman Mohd Tahir berkata UPM berharap forum itu akan menekankan komitmen terhadap pengajaran dan penyelidikan mengenai bidang ini.

“Forum ini dapat mengeratkan kerjasama antara institusi pengajian tinggi dan agensi berkaitan dalam mencari penyelesaian isu alam sekitar dan pembentukan pelan tindakan bagi memastikan kualiti lanskap dan alam sekitar negara terpelihara pada masa akan datang,” katanya.



*Tun Jeanne Abdullah menyampaikan ucapan sempena sidang media Malaysia Green forum 2010.*

**Berita ini disediakan oleh Seksyen Media, Bahagian Komunikasi Korporat UPM. (Noor Eszereen Juferi, 03-89466013/Fotografi Ahmad Fua'ad Alwi,89466199).**